

Geoffrey Wever (Futuro):

“Den eleccion ta importante pa kies hende cu ta bin cu plan realistico”

Recientemente, Bon Dia Aruba a combersa cu candidato #2 riba lista di partido Futuro, y minister demisionario di Asunto Economico, Desaroyo Sostenible y Comunicacion, Geoffrey Wever. Den nos articulo ayera, Wever a papia tocante su decisionnan politico y su logronan como minister. Awe e ta conta mas tocante e proposicionnan di su partido pa Eleccion 2024.

Plan di vivienda holistico

Wever ta reconoce cu pa ciudadanonan local “ta casi imposible pa yega na un hogar di nan mes.”

“E clase medio cu nos tabata conoce a casi desaparece,” el a bisa, agregando cu tereno a bira carisimo – esey si tin disponible mes. “Industria di Airbnb tin impacto riba prijs di real estate, door cu e demanda ta asina halto y suministro, e oferta, ta keda igual, prijs automaticamente ta keda subi.” Wever ta destaca cu den pasado no tabatin un programa di emision di tereno regular. “Tanto tereno pa aña, of bao cierto criteria, den cierto bario. Un plan di vivienda holistico.”

E plan holistico lo ta “basa riba e demanda y basa riba loke tin disponible, pa tur hende sa kico por y kico no por, y pa e proceso ey bira transparente y eficiente. P’esey nos ta para pa un reorganizacion completo di DIP.” Wever ta menciona cu e proceso desde cu un ciudadano haci peticion pa un tereno ta largo y no tin transparencia. “Esaki ta un pais moderno, nos no por trata nos hendenan di e forma aki.”

E plan di Wever ta inclui tambe realocacion di terenonan bandona. “Pa terenonan erfpacht, fundeshi of cas traha riba erfpachtman duna, nan tin den nan acta caba e obligacion cu dentro di seis luna despues cu nan a haya e tereno mester construi. Y basicamente despues di esey, por tuma e tereno back.” E proceso no ta bay “di un dia pa otro,” pero “e sistema t’ey caba. Ta cumplimiento mester bin”

Pa loke ta propiedad riba tereno eigendom, “nos tin un ontegening verordening, un ley cu ta stipula bao cua condicion bo por kita propiedad di un hende y pag’e pa e balor di e propiedad. Esaki ta algo cu sigur den e plan holistico di vivienda nos ta bay tin cu analisa.” E ta referi aki na terenonan eigendom cu tin añas bandona, y cu ademá di “ta mahos bista pa nos pais,” cumpra back e propiedadnan aki lo por yena e necesidad di hende pa tin un hogar.

Y pa e problema y impacto di Airbnb, “a pidi un consultant di Hulanda pa haci un analisis profundo di nos mercado di vivienda, di real estate, y nos tin tur dato. Por ta un otro partido ta den gobierno, pero e trabao ey ta haci cu nan por usa e ora como base pa traha maneho pa atende e problema di vivienda na Aruba.”



Costo di bida/Poder di compra

Segun Wever, tin dos manera pa yuda comunidad mehora nan poder di compra: “Bo por busca manera pa baha prijs, e ora cu e mesun cen por cumpra mas cos. Of bo ta bisa nos no por influencia e prijs, dus nos ta bay zorg pa hende tin mas cen den su man pa por cumpra mas. Esey ta e discusion di poder di compra.”

Wever ta considera cu mirando cu Aruba ta importa hopi producto, baha prijs ta bira complica. Sinembargo, yuda hende, “eigenlijk esaki no ta algo complica.”

“E manera ta hopi conoci caba eigenlijk con bo por yuda mehora poder di compra. E unico cos cu bo mester ta placa. Anto e ora bo ta ban bisa, laga mi ban busca e diferente gruponan con mi ta yuda nan.”

Pakico no ta considera baha impuesto? Wever ta indica cu esey no ta yuda e hende di menos recurso, cu ta gana salario minimo, ya cu casi nan no ta paga belasting. “Bo baha belasting mas, bo no ta yuda e minimumloner. Bo ta yuda esun cu ta ganando riba 30mil florin mehora nan poder di compra.” E ora con pa yuda e minimumloner? Si aumenta salario minimo, esaki ta crea mas gasto pa empresario, cu lo pasa e gasto aki den su producto. Si hopi empresario haci esaki, e prijs di tur cos ta aumenta y e ora e medida di aumenta salario minimo no a duna e resultado desea. “E ora ta mehora e poder di compra di e minimumloner door di dun’e placa den su man, door di reparatietoeslag of door di baha su gastonan. Por ehemplo gasolin, por baha accijns of BBO. Of ta duna un reparatietoeslag, of un combinacion.”

Wever ta destaca si cu por yuda diferente grupo di diferente manera. Dependiendo di cuanto placa tin, mester aloca un porcion na cada grupo.

Interesante ta cu “mi a laga traha door di consultant na Hulanda un koopkrachtmodule.”

Den esaki, ta hinca diferente informacion y e modelo ta calcula e miho manera pa mehora poder di compra pa cada grupo. “Di tur e diferente tipo di famia cu tin – un mama cu un yiu, un mama cu dos yiu, tata, mama y tres

yi – dus e 30 tipo di famia, cada un cu tur nan elementonan. Bo por hinca informacion aden pa bo wak con bo por mehora nan poder di compra. Esaki ta un modelo cu mi a laga traha cu aworaki ta di Aruba, dus tur gobierno cu bin por usele si nan kier mehora poder di compra.”

Espacio financiero pa propuestanan realistico

Pa 2025, tin un surplus di 1.8%, of 137 miyon florin. Un porciento mester bay pa paga debe. E resto ta 50/50 segun palabracionnan cu Hulanda, mita pa paga debe y mita pa inversion.

“Awo e inversion den proyecto ta un espacio cu nos tin. Si nos como gobierno ta bisa, prioridad ta mehora poder di compra den 2025, y no por ehemplo haci cualkier otro proyecto di gobierno... Tin cu papia cu Hulanda si por usa e parti ey, cu ta nos placa, pa 2025 nos kier us’e pa poder di compra. Nos ta papiando eynan di mas o menos 40 miyon florin.”

Ademas, Wever ta menciona cu normalmente ta usa solamente 90 porciento di loke ta presupuesta pa gasto di operacion di gobierno. Pero maske a presupuesta di mas, no por usa e placa aki. Door di presupuesta menos, por crea un espacio di “20, 25 miyon florin cu bo por usa.”

Tambe tin refinanciamiento cu Hulanda. “Si nos yega e deal cu Hulanda, nos tin riba e lening cu Hulanda zowiezo 30 miyon florin di reduccion di interes. Esey no ta di biaha den 2025, pero e tarea di gobierno ta pa wak si Hulanda ta bay permiti nos usa e placa den 2025 caba. Pero e ta bay ta desde momento cu e rijkswet wordo aproba, nos ta bay haya e besparing ey.”

“Espacio financiero tin,” Wever ta enfatisa. “Den eleccion ta importante pa kies hende cu ta bin cu plan realistico cu no ta bin engaña pueblo cu plannan cu bo sa nan no por realisa. Nos tin bon conocimiento di e fondonan, presupuesto, unda e besparingnan ta, con nos por logra e placa pa por duna back na pueblo.”

“Seguridad na final di dia ta parti di e modelo economico”

Un topico cu ta halando hopi atencion

den region di Latino America y Caribe ta violencia di arma y di gang. Un fluho di arma, principalmente for di Merca, ta impulsando violencia di gang na varios isla di Caribe. Na Aruba tambe ta mirando señalnan, unda tin mas arma ta circula y tin aumento di crimen cu arma cu hopi biaha ta involucra gang.

“Seguridad di nos comunidad naturalmente mester ta un prioridad di cualkier partido y di cualkier gobierno,” Wever a bisa, indicando cu ta al tanto di e desaroyonan den region y na Aruba.

“Nos sa tambe cu e control na nos fronteranan mester ta mas rigido, pasobra e armanan cu ta drenta ta drenta via lama, dus nos mester reforsa control, pa nos evita cu tin mas circulacion di arma. Y pa bo por controla esaki bo mester percura cu bo mas presencia, visibilidad di polis riba kaya.”

Maske esaki ta nifica inversion den Cuerpo Policial, Wever ta bisa cu no por laga esaki un banda. “Seguridad na final di dia ta parti di e modelo economico di nos, pa nos entrada di turismo, [y] pa nos hendenan tambe naturalmente. Pero si Aruba perde su status como un pais safe, nos tin un problema hopi serio.”

“Diripiente den 10 aña bo a financia tanto empresa y bo a pusha henter un sector”

Pa Wever, economia ta keda central. “Si economia ta fuerte nos tin cuponan di trabao, bon entrada, hende ta biba na final di dia miho.”

Den su periodo como minister, el a pone enfasis riba agricultura comercial, alocando fondo pa Agrifund, dunando prestamo na 2 porciento, estimulando e sector. Actualmente, Hulanda ta yudando identifica e cultivonan cu tin mas chens pa planta na Aruba. Pero, mester a aborda e problema na un escala menor, ya cu “no por aloca 20 miyon [florin] di biaha pasobra bo no tine. Hopi biaha ta bisa no, mi no tin e 20 miyon dus nos no ta haci nada. Mi a bisa no, ban cuminsa chikito, ban demostra cu, cu poco placa tambe por.”

A cuminsa Agrifund cu 3 miyon, di cual a usa 2 caba y ta den fase di usa e ultimo miyon. Idea ta pa agrega fondo pa Agrifund den cada presupuesto, un tiki cada aña. “Bo keda haci esey tur aña, diripiente den 10 aña bo a financia tanto empresa y bo a pusha henter un secto.”

Tambe tin un enfoke pa Fintech, unda a “cuminsa cu un programa cu Nacionnan Uni ta bay yuda nos desaroya industria.”

Wever ta apela na comunidad, bisando cu “ta importante pa Futuro bin den gobernacion, pa nos por continua cu e proyectonan aki, cu ta e base di cosnan hopi grandi.”

FUTURO